

# 雷公炮製藥性解

明 雲間 李中梓士材編輯  
清 吳門 王子接晉三重訂

鄞縣 曹赤電炳章校點

## 卷六

### 菜部

生薑。味辛。性溫無毒。入肺心脾胃四經。主通神明。去穢惡。散風寒。止嘔吐。除泄瀉。散鬱結。暢脾胃。療痰嗽。製半夏和藥。要熱去皮。要冷留皮。惡黃芩。

按生薑辛入肺。肺得所勝。則氣通宣暢。主宰精靈。故能通神明。神明通則一身之氣皆爲我使。而亦勝矣。一身之氣勝。則中焦之元氣定。而脾胃出納之令行。邪氣不能容矣。故能去穢惡。經云。秋不食薑者。蓋以燥金主令。天道斂收。薑則味辛。善散肺氣。人肖天地以生。未有干天地之和而猶受其益者。諺所謂夜不

食薑亦以夜氣斂而薑性散耳。如療病則不可泥也。宜常用而不宜多用。

乾薑味辛。性大熱有毒。入肺大腸脾胃腎五經。生者味辛。能行血。逐寒邪而發表。熟者味苦。能止血。除胃冷而守中。沉寒痼冷。腎中無陽。脈氣欲絕者。用黑附爲引。按乾薑之辛。本職肺家。以其性熱。故又入脾胃大腸。至於少陰之入。黑附爲之引耳。夫血遇熱則走。生者行之。固其宜也。而吐衄下血崩漏淋產證。熟者反能止之。何也。蓋物極則反。血去多而陰不復。則陽無所附。得此以助陽之生。而陰復矣。且見火則味苦色黑。守而不走。血安得不止耶。然必病久氣虛。亡陽而多盜汗。及手足冷者宜用。若初病火熾。遽爾投之。是抱薪救火。危亡立至矣。可不謹乎。丹溪曰。乾薑散肺氣。同五味能止嗽。治血虛發熱。該與補陰藥同用。入肺中利肺氣。入腎中燥下溼。入氣分引血藥入血也。東垣云。多用能耗元氣。壯火食氣。故也。乾薑辛熱。皆言補脾。海藏獨言泄脾。何也。泄之一字。非泄脾之正氣。是泄脾中寒溼之邪。蓋以辛熱之劑燥之。故曰泄脾也。生者能墮胎。萊菔味辛甘。性溫無毒。入肺脾二經。主下氣消食。除痰止嗽。解渴化癖。搗汁磨墨。澱止吐血。熟者補脾。其子下氣猶捷。有推墻倒壁之功。水研可吐風痰。醋研可敷

惡毒。俗名蘿蔔。解麵毒。

按萊菔辛宜肺部。甘走脾家。故兩入之。生者下氣。多食耗血。以辛多於甘也。熟者補脾。多食滯氣。以甘多於辛也。其子力倍。虛者戒之。

白芥子。味辛。性溫無毒。入肺胃二經。主下氣。止翻胃。消瘰癧。辟鬼邪。歐疰氣。除皮裏膜外痰涎。醋研可敷射工毒。其莖葉堪卻冷氣。能安五臟。

按白芥子辛宜於肺。溫宜於胃。故俱入之。氣虛及肺胃中有火者。咸禁食之。

韭。味辛。性溫無毒。入肺脾腎三經。主下氣和中。補腎益陽。利腰膝。和臟腑。除胸腹痰癖。痼冷。止白濁遺精。其根搗汁。下膈中瘀血。殊效。其子較根葉猶勝。忌糖蜜及牛肉。

按丹溪云。韭屬金而有土與水。宜入肺脾腎。以主三經之證。然不宜多食。令人神昏目暗。

蒜。味辛。性大溫。有小毒。入脾胃二經。主溫中消食。止霍亂轉筋。除吐瀉及中脘冷痛。瘟疫瘴癘。蠱毒疔腫。邪痺毒氣。

按蒜味辛溫。故入脾胃以理諸證。丹溪云。性熱快膈。人皆喜食。多用則傷脾損

肺。壞肝昏目。生痰發嗽。面無顏色。化肉之功。不足多也。有志願生者。宜知自警。胡荽。味辛。性溫微毒。入肺脾二經。主通小腹氣。除四肢熱。止頭痛。消穀食。散痧疹。齊痘瘡。其子煎油。可敷禿瘡。忌斜蒿同食。令人汗死。

按胡荽。味辛。肺所藥也。性溫。脾所快也。故皆入之。肺主皮毛。脾主肌肉。所以理痧痘等證。多食損精神。發痼疾。令人健忘。脚氣狐臭者。食之愈甚。

葱白。味辛。性溫無毒。入肺胃肝三經。善發汗。通骨節。逐肝邪。明眼目。去喉痺。愈金瘡。安胎氣。止鼻衄。治霍亂轉筋。理傷寒頭痛。殺魚肉毒。通大小腸。散面目浮腫。止心腹急疼。脚氣奔豚氣。連鬚搗。可除蛇傷。蚯蚓傷。畏蠶。菘菜。常山同食。殺人。

按皮毛。腠理。肺所司也。風淫木旺。肝所患也。邪傳入裏。胃所疾也。葱白功專發散。又主通中三經之入。有由來矣。多食則伐氣昏神。虛者戒之。

冬葵子。味甘。性寒無毒。入小腸膀胱二經。主滑胎產。利小便。療熱淋。逆生者得之。即順。胎死者得之。即下。能通乳汁。堪潰癰疽。

按冬葵子。性最滑利。能宣積壅。宜入手足太陽。以爲催生之劑。然不可預服。恐胞未轉而先催。空涸其水。反艱其產耳。癰疽者。榮氣不從。逆於肉理。乳閉者。亦

凝滯之所致也。得冬葵以導之。而不瘳者鮮矣。

白冬瓜味甘。性微寒無毒。入脾胃大小腸四經。主胸前煩悶作渴。臍下水脹成淋。通大小便。大解熱毒。可貼癰疽。又解丹石毒及魚毒。

按冬瓜味甘。宜入脾胃。性走而急。宜入大小腸。煩渴癰疽。皆熱也。其性寒。故能解之。丹溪曰。久病與陰虛者忌服。未被霜而食之。令人成反胃病。

## 人部

乳汁味甘。性平無毒。入心肝脾三經。主健四肢。榮五臟。實腠理。悅皮膚。安神魂。利關格。明眼目。久服延年。

按乳汁本血也。心主血。肝藏血。脾裹血。宜並入之。夫婦人之血。降爲月水。升爲乳汁。房術云。女子一身屬陰。惟月水屬陽。故名水中金。惜神農本經不載。而諸家本草。遂以爲血屬於陰。其性大冷。不知月水乳汁。本同一物。月水之熱。人咸知也。今升而爲乳。質較輕清。中和補益。實爲過之。何反以爲大冷耶。若果大冷。則必能傷脾。小兒食之。當泄利不止矣。有是理哉。特不宜與食混進。誠能令人

瀉耳。

金汁味甘苦。性大寒無毒。入心經。主天行狂熱。陰虛燥熱。解一切毒。療一切瘡。埋土年久者佳。

按素問曰。濁陰出下竅。宜其足以制陽亢。而心則火之主也。故獨入之。造法於冬月。取竹籬置缸上。櫻皮鋪滿。加草紙數層。屎澆於上。汗淋在缸。新甕盛貯。磁鉢蓋之。鹽泥封固。埋地年深。自如清泉。聞無穢氣。又法。臘月取淡竹刮去青皮。浸廁中取汁亦佳。

屎蛆味甘鹹。性平無毒。入脾經。主小兒疳積脹滿。須水中漂淨。貯於桶中。剖蝦蟆飼肥。烈日曝蒸。蓋密即死。文火烘燥用。

按蛆本濁陰下降流動不拘之物。有行下之理。故專入脾經。以療兒疳最效。人溺味鹹。性寒無毒。入心肺二經。主勞熱吐衄。痰喘咳嗽。撲傷瘀血。產後敗血。生津解渴。能通二便。童男者猶勝。積垢在器。即各人中白。瓦上文火煨之存性。酒醋兼制。與溺同功。療口瘡痰結。須露天經年者佳。

按人溺降火最速。丹溪曰。氣有餘便是火。肺主氣。心屬火。宜均入之。降火而不

傷於寒涼。且補益之功甚大。而本草不言。惜哉。褚澄云。以童便治血證。百不一死。庶得其用矣。

秋石。味鹹。性微寒。無毒。入肺腎二經。主滋腎水。返本還元。養丹田。歸根復命。安和五臟。潤澤三焦。消欬逆稠痰。退骨蒸勞熱。能除鼓脹。亦軟堅積。明目清心。延年益壽。

按秋石之鹹。本專入腎。而肺即其母也。故并入之。須用陰陽煉者。兼而服之。得坎離既濟之義。東坡有煉法可用。

月水。性味經絡。諸書不載。主男子虛羸。中傷幾死。解藥箭毒。首經者猶屬純陽。能回生再造。

按月水之補。實令人有起死之功。今時罕有能用之者。惜哉。

髮。味苦。性微溫。無毒。入心經。主咳嗽五淋。二便不通。燒灰吹鼻。立止衄血。亦主小兒驚癇。胎髮及童男女剃下者尤佳。多產婦人髮。燒灰酒服。極善催生。

按髮爲血之餘。而心則主血者也。故獨入之。丹溪稱其補陰甚捷。良有故耳。

雷公云。凡使須用男子二十已來。無疾患。顏貌紅白。於頂心翦下者佳。凡於丸

散膏中。先用苦參水浸一宿。漉出入瓶。以火燒之。令通赤。放冷。研用之。  
紫河車味甘。性大溫無毒。入心脾腎三經。主諸虛百損。五勞七傷。骨蒸潮熱。體弱  
氣短。吐衄。男子精衰。婦人無孕。的是仙丹。取肥壯者洗淨。抽去紫筋。切碎。入童便  
二碗。入鉛餅重湯煮爛。一晝夜方開。杵成膏用。世俗有埋地日久。化作清泉者。此  
名河車水。主天行時疫熱狂。小兒丹疹熱毒。

按紫河車味甘。宜其歸脾。父之精也。宜歸腎臟。母之血也。宜入心家。夫其精血  
所結。未有男女。先立胚胎。渾然太虛。實乾坤之橐籥。鉛汞之根基。九九數足。兒  
則載而乘之。故名河車。又曰紫者。以紅黑色相雜也。合坎離之色。得妙合之精。  
雖成後天之形。實稟先天之氣。補益之功。更無足與儔者。第其性溫。若有火證  
者。必得便制。斯無他患耳。

天靈蓋味鹹。性平無毒。所入經絡。諸書不載。主傳屍鬼疰。并療大傷。取得後。用糠  
灰火罨一夜。待腥穢氣出盡後。用童便於磁鍋內煮一伏時。埋於地下可深一尺。  
亦一伏時。取出聽用。陽人使陰。陰人使陽。

按天靈蓋即頂蓋骨也。神農本經不載。後世醫家始用之。此本同類之物。見則



當憐而悲之。乃取而食之。殊非仁人之用心。世稱孫思邈有大功於世。以殺命治命。尚有陰責。况於是乎。若必不得已而用之。當取年深漬朽者良。以其絕屍氣也。

死人枕。味鹹。性平無毒。所入經絡。諸書不載。主傳屍鬼疰邪氣石蛔。取之煎湯用。用畢送還原處。

按死人枕卽腦後骨也。夫鬼邪乘人。非藥石可攻。用死人枕者。所謂引之以類也。石蛔者。久虻也。醫療既窮。虻蟲轉堅。藥劑不能療。所以需鬼物驅之。用畢卽送還原處者。一則使邪疰之氣有所依歸。一則勿以療人而傷鬼也。古有神醫徐嗣伯劉大用者。用之輒驗。

### 禽獸部

黑嘴白鴨。味甘。性微寒無毒。入肺腎二經。主大補虛勞。最消毒熱。利小便。除水腫。消脹滿。利臟腑。退瘡腫。定驚癇。綠頭者亦堪用。白目者能殺人。忌龜鼈肉。

按肺之色屬白。腎之色屬黑。黑嘴白鴨宜其入此二經。肺腎受補。誠爲勞證仙。

方得童便煮服。功效不可盡述。

烏骨毛鷄味甘性微溫。有小毒。入五臟諸經。主虛羸折傷癱疽。及心腹惡氣。亦能安胎。過食生火動風。

按丹溪曰。鷄屬土而有金與木火。則所稟者惟少水爾。今得其毛骨之黑。是五行具備。故於五臟靡弗入也。於卦爲巽。巽爲木。故能生火。又爲風。故能動風。日華子以爲除風溼麻痺。於理未合。

雄雀味甘鹹。性熱無毒。入命門經。主益氣壯陽。其腦主耳聾及凍瘡。頭血主點雀盲。糞名白丁香。主癩癰癤。點目內努肉血膜。除癥瘕伏梁。爛疔癬積塊。

按雀之鹹熱。宜入命門而補火。然相火久熾。其水必衰。勿宜過服。致傷腎臟。妊娠尤忌食之。腦血及白丁香之功。咸性熱所致爾。

雀卵味酸。性溫無毒。主下氣。男子陰痿不起。強之令熱。多精有子。腦主耳聾。頭血主雀盲。雄雀屎齒痛通用藥。療目痛。治癱癘。女子帶下。溺不利。除疝瘕。五月取之。良。注云。兩頭尖者是雄雀屎。

雷公云。雀蘇。凡使勿用雀兒糞。其雀兒口黃未經溼者。糞連蘇。若底坐尖在上。

卽曰雌。兩頭圓者是。陰人使雄。陽人使雌。凡採之。先去兩畔有附子生者通用。然後於鉢中研如粉。煎甘草湯浸一宿。去上清。甘草水盡。焙乾任用。

伏翼。味鹹。性微熱有毒。不載經絡。主逐五淋。利水道。去翳明目。令人喜樂。媚好忘憂。久服延年。尿名夜明砂。破腹中血氣。及寒熱積聚。除驚悸。血堪點眼。形重一觔。色白如雪者佳。

按伏翼原名蝙蝠。以其晝伏夜飛。因稱伏翼。能伏氣。冬月不食。故多壽。人服之。宜其有延年之功矣。

雷公云。凡使要重一斤者。方採之。每修事先拭去肉上皮毛爪腸。留翅并肉脚及嘴。然後酒浸一宿。漉出。取黃精自然汁塗之。炙令乾。方用。每修事重一斤。一個。用黃精自然汁五兩爲度。

龍骨。味甘。性平無毒。入腎經。主丈夫精滑遺洩。婦人崩中帶下。止腸風下血。療瀉痢不止。得五色具者佳。其齒主驚癇狂疾。俱畏乾漆。蜀椒。理石。石膏。

按經曰。腎主骨。宜龍骨獨入之。觀其沾舌。大抵齋之用居多。故主精滑等症。經曰。瀉可去脫。是之謂耶。

虎骨。味辛。性微熱無毒。入腎經。主邪氣鬼疰。筋骨毒風攣急。酥炙用。畏乾漆。蜀椒。磁石。

按虎骨入腎。亦以腎主骨故也。其治骨間毒風者何也。易曰。風從虎。夫風。木也。虎。金也。木受金制。焉得不從。

雷公云。虎睛。凡使須問獵人。其眼有雌有雄。有老有嫩。有殺得者。惟有毒箭死者勿使。能傷人。凡用虎睛。先於草羊血中浸一宿。漉出。微微火上焙乾。搗成粉。候衆藥取出。合用之也。

犀角。味苦酸鹹。性寒無毒。入心肝二經。主百毒蠱疰。鬼魅邪氣。傷寒瘟疫。煩躁顛狂。痘疹血熱。癰疽腫毒。清心鎮肝。明目定驚。孕婦忌服。須紋細色烏。光明滑潤者佳。取其茸尖。功力具備。松脂爲使。惡雷丸。忌鹽。

按犀角苦寒。本入心家。瀉火。又入肝臟者。蓋以火不妄炎。則金能制木也。丹溪曰。屬陽性走。比諸角猶甚。痘瘡後用以散餘毒。俗以爲常。若非有餘毒而血虛者。與血燥發熱者用之。禍無極矣。

雷公云。凡使勿用奴犀角。病水犀。攣子犀。無潤犀。惟取細紋色烏黑而光潤者。

上。凡修治時銼其屑入臼中。杵令細。再入臼中研萬匝。方入藥用。婦人有妊勿服。能消胎氣。忌鹽。

羚羊角。味苦鹹。性寒無毒。入肝經。主傷寒熱在肌膚。溫氣注伏在骨間。邪氣不祥。驚夢狂越。心神不寧。小兒卒熱驚搐。產後敗血冲心。清心解毒。明目益氣。燒灰又主食噎不通。其角多倒掛痕深入者爲真。

按丹溪曰。羚羊屬木。宜入厥陰。木得其平。而風火諸症無能乘矣。

雷公云。凡用有神羊角。其神羊角長有二十四節。內有天生木胎。此角有神力。可抵千牛之力也。凡修事之時。勿令單用。不復有驗。須要不拆元對。以繩縛之力。將鐵銼子銼之。旋取用。勿令犯風。銼未盡處。須三重紙裹。恐力散也。銼得了。卽背風頭重篩過。然後入藥中用之。若更研萬匝。用之更妙。免刮人腸也。

牛黃。味苦。性平無毒。入心經。主大人癲狂發瘕。中風痰壅不語。小兒驚癇天弔。客忤口禁。除邪逐鬼。定魄安魂。能墮胎孕。須體輕微香。磨用色透。置舌上先苦後甘。清涼透心者爲真。人參爲使。惡龍骨。地黃。龍膽。蜚蠊。常山。畏牛膝。乾漆。

按牛黃味苦。宜歸心部。癲狂等症。何不屬心。而有不療者耶。

雷公云。凡使有四件。第一是生神黃。賺得者。次有角黃。是取之者。又有心黃。是病死者。後識者剝之。擘破取心。其黃在心中。如濃黃醬汁。採得便收於水中。黃沾水後。便如碎蕪藜子許。如豆大。便如帝珠子。次有肝黃。其牛身上。先眼如血色。時復鳴吼。照水自有皮光。恐懼人。或有人別采之。可有神妙之事。凡修事先搗細。研如塵。用絹裹。又用黃嫩牛皮裹。安於井面上。去水三四尺。已來一宿。天明方取用之。

麝香味辛。性溫無毒。入十二經。主惡氣鬼邪。蛇虺蠱毒。驚悸癰疽。中惡心腹暴痛。脹滿。目中翳膜。淚眇風毒。溫瘧癰瘡。通關竅。殺蠱蟲。催生墮胎。忌大蒜。

按麝香爲諸香之最。其氣透入骨髓。故於經絡無所不入。然辛香之劑。必能耗損真元。用之不當。反引邪入髓。莫可救藥。誠宜謹之。

雷公云。凡使多有僞者。不如不用。其香有三等。一名遺香。乃麝子臍閉滿。其麝自於石上用蹄尖剔出。落處一里草水不生。並焦黃。人若取得此香。價與珍珠同。二名臍香。採得甚堪用。三名結香。被大獸捕逐。驚畏墜死。被人收得。擘破。見心血在脾上。結作一乾血塊。不堪入藥。凡使麝香。勿近火日。磁鉢中細研任用。

鹿茸味甘鹹。性溫無毒。入腎經。主益氣滋陰。強志補腎。理虛羸。固齒牙。止腰膝酸疼。破流血作痛。療虛勞如瘵。女子崩漏胎動。丈夫溺血洩精。小兒驚癇。散石淋癰腫。骨中熱痛癢。狀如瑪瑙紅玉。長三四寸。破之中有朽木者佳。連頂骨用。長城鹿角主逐鬼邪。益神氣。續絕傷。強筋骨。消癰腫。愈惡瘡。及婦人夢與鬼交。麋茸及角功相倣。而性更熱。專主補陽。麋鹿角茸四種。俱杜仲爲使。畏大黃。

按鹿茸鹹溫之品。舍腎奚歸。功效雖宏。須脈沈細。相火衰弱者。始爲相宜。若有火熱者用之。何異抱薪救火。其角亦然。麋者更甚。夫麋冬至解角。則屬陽。鹿夏至解角。則屬陰。其性熱。所以其功捷。大凡含血之物。肉易長。角難長。惟二茸不兩月長大至一十二觔。其堅如石。生長神奇。莫過於此。且諸獸之角。終身不易。惟此種一年一易。蓋其性熱。生生不已。舊者未去。新者隨之。氣化穠密。孰能與京。諸賢盛述其功。良有以也。

雷公云。凡使先以天靈蓋作末。然後鋸解鹿茸作片子。以好羊脂拌天靈蓋末。塗之於鹿茸上。慢火炙之。令內外黃脆了。用鹿皮裹之。安室中一宿。其藥魂歸也。至明則以慢火焙之。令脆。方搗作末用之。每五兩鹿茸。用羊脂三兩。炙盡爲

度。又製法用黃柏自然汁浸兩日夜。漉出焙乾。令細搗用。免渴人也。鹿角使之勝如麋角。其角要黃色緊重大好者。緣此鹿食靈草。所以異於衆鹿也。其麋角頂根上有黃色毛。若金線。兼傍生小尖也。色蒼白者上。注乾寧記云。其鹿與遊龍相戲。乃生此異耳。採得角了。須金戴者。並長三寸。鋸解之。以物盛於急水中。浸之一百日滿。出用刀刮去粗皮一重。以物盛。水治令淨。然後用醱醋煮七日。旋旋添醋。勿令少歇。成時不用煮火。只從子時至戌七日足。其角白色軟如粉。卽細搗作粉。却以無灰酒煮。其膠陰乾了。重重研篩過用。凡修事十兩。以無灰酒一盞煎乾爲度也。孫真人云。鹿肉解藥毒。不可久服。蓋服解毒草也。孟詵云。主益氣。不可以鼻嗅。其茸中有小白蟲。視之不見。入人鼻必爲蟲。藥不及也。阿膠味甘鹹。性微溫無毒。入肺肝腎三經。主風淫木旺。肢節痠疼。火盛金衰。喘嗽痰血。補勞傷。療崩帶。滋腎安胎。益氣止痢。明澈如水。質脆易斷者真。山藥爲使。畏大黃。蛤粉炒成珠用。

按阿膠用黑驢皮造成。黑屬水。專入腎。能尅火。蓋以制熱則生風之義。故宜入肝。且火得制則金亦無侵。故又宜入肺。夫東阿井係濟水所生。性急下趨。清而



且重。用之煎煮。攪濁澄清。所以能清上炎之火。及上逆之痰也。熊膽味苦。性寒無毒。入膽經。主時氣熱盛。變爲黃疸。小兒風痰壅塞。驚癇疳蠱。殺蟲散毒。可敷惡瘡及痔。入水分塵。如練不散者真。惡防己地黃。

按熊膽入膽。從其類也。清火定驚之功。較勝諸膽。

雷公云。凡收得後。煉就器中安。每一斤熊膽。入生椒十四個。煉去滓。并椒入瓶中。收任用之。

臞臍。味鹹。性大熱無毒。入脾命門二經。主助腎添精。補中益氣。鬼氣尸疰。夢與鬼交。宿血癥結。心腹疼痛。置睡犬傍。驚狂跳走。入水不冰者真。酒浸一宿。紙裹於文火上炙脆。細剉搗用。

按臞臍。臍鹹熱之品。本入命門補火。脾家所快者。熱也。故亦入之。助陽之功。獨甲羣劑。今出登萊州。卽海狗腎也。其狀頭似豕。尾似魚。止生兩足。價殊貴。類多僞者。須細辨之。

雷公云。凡使先須細認其僞者。海中有獸號曰水烏龍。海人采得取腎。以充臞臍。入諸藥中。修合恐有誤。其物自殊有一對。其有兩重薄皮裹丸核。其皮上